



Goranzko berrikusketa munduko ekonomiarentzat

Martxoan, munduko ekonomiarentzat aurkeztu diren eszenategi makroekonomikoen berrikuspenek goranzko joera izan dute, hainbat herrialdetan, bereziki Estatu Batuetan, zerga plangintza garrantzitsuak abian jarri direlako, diru politika oso hedakorra mantendu delako eta ekonomia garatu gehienetan txertaketa egitasmoak garatu direlako. Hori horrela izanda, **ELGEk 1,4 puntutan gorantz berrikusi ditu munduko ekonomiarako aurreikuspenak 2021ean, eta hiru hamarretan, berriz 2022an**. Berrikiago, Nazioarteko Diru Funtzak (NDF) iragarri du aurreikuspenen goranzko zuzenketa bat aurkeztuko duela laster. Nazioarteko erakunde nagusiek, ziurgabetasuneko garai hauetan, oinarrizko eszenategi bat eta, gutxienez, beste eszenategi alternatibo bat aurkezten dituzte, hobe edo txarragoa, txertaketa prozesuaren azkartasunaren eta eraginkortasunaren arabera. Goranzko mugimendu horiek iradokitzen dute aipatutako hiru eremu horietan (fiskala, monetarioa eta epidemiologikoa) hartutako neurriek oinarrizko eszenategian kontuan hartu zirenak hobetzen dutela.

Orobat, martxo hilabete ona izan da adierazle aurreratuak deitzen direnentzat. Horien artean, adierazgarriena PMI konposatua da, sendotasun handia erakutsi duena garatutako eremu ekonomiko nagusietan. Zehazkiago adierazita, **AEBetan 59,1era iritsi da adierazle hori, Erresuma Batuan 56,6ra igo da eta Eurogunean, berriz, 52,5ean kokatu da, hedapeneko eremuan jada**. Alemanian ere bultzada handia eskuratu du adierazle horrek (56,8). Europako gainontzeko herrialdeetan ere bilakaera ona hauteman da, nahiz eta oraindik uzkurtze eremuan dauden. Frantzia da kasu horietako bat, 49,5ean kokatu baita. Azkenik, Japonia gainerako herrialdeen hobekuntzatik aldendu da eta 48,3an mantentzen da, aurreko hilabeteetan jasotako antzeko maila baita. Ia herrialde guztietan ikusten da aurreko aldizkarietan aipatu den sektore bikoiztasuna. Hala, manufakturako PMI indizea inoizko mailarik gorenetan dago euroaren eremuan. Aitzitik, zerbitzuei kalte egiten jarraitzen diete pandemia kontrolatzeko ezarritako mugikortasun murrizketek.

Era berean, **Europako herrialdeen sentimendu ekonomikoa nabarmen hobetu da martxoan**. Adierazle horrek hiru sektore nagusiak hartzen ditu barne, txikizkako merkataritzarekin eta kontsumitzailearen konfiantzarekin batera, eta, beraz, ekonomia osoaren seinale ona da. Bere batez besteko historikoa 100eko balioan kokatzen da eta, ondorioz, zifra horren azpitik (gaintik) egoteak uzkurtze (hedapen) une bat adierazten du. Bada, martxoan, Euroguneak bere batez besteko historikoa zertxobait gainditu zuen, eta 101,0ra iritsi zen, duela urtebete pandemia hasi zenean utzi zuen hedapeneko eremuan. Beste behin ere, herrialde abantailatsuena Alemania da (103,7), eta Frantziak (96,8) eta Espainiak (96,9) hobera egin dute, baina atzerago jarraitzen dute.

Ingurune ekonomikoari buruzko ikuspegi baikorrago hori enpleguaren igurikimenetan ere islatzen da, martxoan nabarmen hobetu baitira. Adibidez, Eurogunean otsaileko 90,9tik martxoko 97,7ra igaro da. Are gehiago, eremu horretako zenbait herrialdek 100 puntuko langa gainditzen dute, eta horrek nolabaiteko baikortasuna adierazten du enpleguari dagokionez. Hori gertatzen da Alemanian (100,2), Belgikan (101,4), Herbehereetan (100,5) eta Portugalen (103,2), besteak beste. Espero dugu produkzioaren eta enpleguaren aldeko bilakaera udaberriko hilabeteetan indartuko dela, biztanleriaren txertaketak ekonomiari konfiantza itzultzen dion heinean.